

## Nósanna Imeachta chun Iarratais ar Arduithe Céime

### Acadúla a Mheas do Scéim na Léachtóirí

### Sinsearacha/Ollúna Pearsanta

#### 1. Réamhrá

Is é cuspóir na cáipéise seo treoir bhreise a sholáthar don Choiste Arduithe Céime Acadúla (APC) i dtaca le hiarratais ar ardú céime a mheas. Ba chóir an cháipéis seo a léamh i gcomhar leis an bPolasaí Arduithe Céime Acadúla.

#### 2. Ballraíocht an Choiste

Molfaidh an tUachtarán ballraíocht an Choiste Arduithe Céime Acadúla agus déanfaidh an Chomhairle Acadúil í a fhaomhadh. Foilseofar liosta na n-ainmneacha faofa ar shuíomh gréasáin Acmhainní Daonna.

- An tUachtarán Ionaid agus Meabhránaí (Cathaoirleach) (Ex-Officio)
- An Leas-Uachtarán don Taighde (ex officio)
- Beirt Lán-Ollúna ó gach Coláiste (1 Fear, 1 Bean)
- Ceathrar a bheidh ainmnithe ag an Uachtarán, a chaithfidh a bheith ag leibhéal an Léachtóra Shinsearaigh nó os a chionn (ba cheart go mbeadh an Bord ar an iomlán cothrom ó thaobh inscne de)
- Beirt chomhaltaí sheachtracha, duine ó réimse STEM, duine ó réimse na nDán, na nDaonnachtaí agus na nEolaíochtaí Sóisialta, a bhfuil taithí shuntasach acu ar arduithe céime i suíomh Ardoideachais na hÉireann (le hathbhreithniú tar éis dhá bhabhta ardaithe céime)

Seachas na comhaltaí ex officio agus seachtracha, is iondúil go mairfidh téarma ballraíochta an Choiste APC trí bliana, tréimhse a d'fhéadfaí a athnuachan, i gcásanna eisceachtúla, go ceann trí bliana eile nuair is gá ó thaobh comhsheasmhachta agus leanúnachais de. Tá ballraíocht an Choiste APC faoi réir athbhreithnithe ag an Uachtarán, de réir mar is gá.

D'fhonn leanúnachas agus athnuachan leanúnach ballraíochta a chinntiú, beidh an chéad chohórt atá ainmnithe ag an Uachtarán ar an gcoiste ar feadh dhá bhliain. Ina theannta sin, ar dtús báire, fanfaidh ainmní ollaimh amháin ó gach Coláiste ar feadh trí bliana, agus ainmní amháin ar feadh ceithre bliana. Mairfidh gach ceapachán ina dhiaidh sin ar feadh trí bliana. Déantar é seo chun a chinntiú go n-athraíonn aon trian de bhallraíocht an Choiste gach bliain.

---

1 le toghadh ag an gComhairle Acadúil.

Déanfaidh Cathaoirleach an APC ceardlanna d'iarrthóirí tuairim is mí amháin roimh an spriocdháta d'iarratais.

Tacóidh Acmhainní Daonna leis an riarachán don Choiste Arduithe Céime Acadúla, agus beidh an Stiúrthóir Acmhainní Daonna nó a (h)ainmní i láthair ag gach cruinniú.

### 3. Freastal ar Chruinnithe APC

Tá an Cathaoirleach freagrach as a chinntiú go bhfuil córam ag an gcruinniú, is é sin, go bhfuil ar a laghad deichniúr comhaltaí den APC i láthair, agus gur mná iad 40% ar a laghad díobh siúd atá i láthair agus gur fir iad 40%. I gcás nach amhlaidh atá, déanfar an cruinniú a chur siar.

Coinneofar súil ar thinreamh go bliantúil agus, más gá, déanfar moltaí chun ballraíocht an Choiste a athrú chuig an gComhairle Acadúil.

### 4. Coimhlint Leasa

Ag tús gach cruinniú den APC ní mór do chomhaltaí aon choimhlint leasa a dhearbhuí.

Dearbhóidh comhaltaí APC aon ghaol le hiarrthóir a d'fhéadfaí a mheas mar dhuine a chruthaíonn leas pearsanta nó coimhlint a bheadh in ann cur isteach ar a mbreithiúnas neamhchlaonta. Ba chóir Cuid a 3 de Chód Iompair na hOllscoile do Chomhaltaí Foirne a úsáid mar threoir ina leith seo.<sup>2</sup>

Sa chás go bhfuil iarratas á mheas ó iarrthóir a bhfuil a C(h)eann Scoile ina c(h)omhalta den APC, ní choinneofar an Ceann Scoile amach ón gcruinniú ach iarrfar air/uirthi tuairimí ar an iarratas a choinneáil siar go dtí go mbeidh tuairimí gach comhalta eile den choiste tugtha.

Ní dhéanann comhaltaí an APC ionadaíocht ar Choláistí/Scoileanna agus níor cheart go ndéanfaí cásanna ar leith a mholadh. Is é ról an APC a chinntiú go dtugtar breithniú neamhchlaonta, cothrom agus comhsheasmhach ar gach iarratas.

Tá dualgas ar Mheasúnóirí Seachtracha chomh maith aon choimhlint leasa a chur in iúl agus iarratas á mheas. San áireamh sa chuireadh ón APC chuig an Measúnóir Seachtrach beidh an t-éileamh seo agus iarrfar ar mheasúnóirí sonraí maidir leis an gceangal atá acu leis an iarrthóir mar chuid den mheasúnú a chur ar fáil. Seolfar cóip de na treoirlínte maidir le coimhlint leasa chuig Measúnóirí Seachtracha.

---

<sup>2</sup> Tá an Cód Iompair don Fhoireann ag: <https://www.nuigalway.ie/media/oifiganrunai/nonstatute/Code-Of-Iompar-ar-Fhoireann.pdf>.

Beidh ar gach comhalta den APC agus gach measúnóir seachtrach dearbhú maidir le coimhlint leasa a shíniú.

## 5. Ceisteanna Comhionannais

Tá breithniú ar shaincheisteanna comhionannais ríthábhachtach maidir le hoibriú éifeachtach nós imeachta na hOllscoile i leith ardú céime atá deartha chun comhsheasmhacht agus cothroime a chinntiú i gcinnteoireacht.

Ní féidir leis an gCoiste aon saincheisteanna comhionannais nach bhfuil tagairt shonrach déanta ag an iarrthóir dóibh ina (h)iarratas ar ardú céime a ardú ná a phlé.

Tá an APC tiomanta do neamh-idirdhealú ar na naoi bhforas lena n-áirítear inscne, stádas pósta, stádas teaghlaigh, gnéaschlaonadh, creideamh, aois, míchumas, cine agus ballraíocht den lucht siúil. Déanfaidh an APC aon saincheisteanna comhionannais a mheas de réir Pholasaithe Comhdheiseanna na hOllscoile.<sup>3</sup>

Beidh ar gach comhalta den choiste freastal ar oiliúint chomhionannais agus ar oiliúint maidir le claonadh neamh-chomhfhiosach, mar aon le hoiliúint ar aiseolas éifeachtach a thabhairt.

## 6. Measúnú ar iarratais a bhfuil saoire luaite iontu (seachas Comhaltaí Foirne Páirtaimseartha, Saoire Neamhláithreachta)

Is é aidhm na forála seo aird a dhíriú ar an gcaoi a bhfágtar níos mó ban agus cúramóirí ar lár go staitistiúil i gcritéir roghnúcháin áirithe, agus chun na critéir mheasúnaithe a chur in oiriúint dá réir sin. Ní bheidh ar chumas aon chomhalta foirne a ghlac am saor óna p(h)ost de bharr saoire mháithreachais, saoire uchtaíoch, saoire do thuismitheoirí, saoire bhreuiteachta, saoire bhreuiteachta a bhaineann le míchumas agus saoire cúramóra an méid céanna aschur a chur ar fáil agus a bheidh ag comhalta foirne den chineál céanna nár ghlac am saor.

Nuair a luaitear saoire a bhfuil taifead uirthi in iarratas, déanfaidh an Coise Arduithe Céime Acadúla measúnú ar an aschur oibre i gcomparáid leis an deis oibre, i.e. cuirfear aschur acadúil san áireamh ar bhonn *pro-rata* i gcás comhalta foirne a thóg saoire den chineál sin.

---

<sup>3</sup>Tá polasaí na hOllscoile ina leith seo ag: <https://www.nuigalway.ie/equalityanddiversity/policies-procedures/>

## 7. Nósanna Imeachta Measúnachta

### 7.1. Spriocdhátaí agus Prionsabail Oibre

Breithneoidh an APC iarratais atá curtha faoi bhráid Acmhainní Daonna faoin spriocdháta cuí. Beidh dhá spriocdháta den sórt sin in 2020: 16.00 ar an lá deireanach oibre de mhí Eanáir agus 16.00 ar an lá deireanach oibre de mhí Lúnasa. Beidh dhá spriocdháta den sórt sin ann do 2021 agus 2022: 16.00 ar an lá deireanach oibre de mhí Feabhra agus 16.00 ar an lá deireanach oibre de mhí Lúnasa.

- Is iondúil go léifidh gach comhalta den APC gach iarratas roimh chruinniú an APC agus go gcuirfidh siad leis an bplé ar gach iarratas.
- Oibreoidh an APC ar bhonn comhaontaithe.
- Mura bhfuil comhalta den APC i láthair ag an gcruinniú ina ndéantar moladh, dearbhóidh sé/sí a c(h)omhaontú nó a (h)easaontas leis an gcinneadh ag an gcruinniú APC ina dhiaidh sin.<sup>4</sup>
- Is iondúil go mbeidh ar an gcomhalta nach mbíonn rannpháirteach tuairisc ar na hiarratais a chur isteach roimh chruinniú an APC.

### 7.2. Modhanna Oibre – Cás Prima Facie

#### 7.2.1. Roimh an gCruinniú

- Roimh an gcruinniú APC déanfaidh gach comhalta den APC athbhreithniú ar gach iarratas i gcoinne an Chreata Forbartha don Fhoireann Acadúil d'fhonn teacht ar thuairim aonair féachaint an bhfuil cás prima facie ann.<sup>5</sup>
- Ba chóir go ndéanfaidh gach comhalta den Bhord tuairim a thabhairt i leith gach ceann de na príomh-cheannteidil do gach iarrthóir.
- Ní chuirfidh na comhaltaí aon eolas eile san áireamh maidir leis an iarratas ná an t-iarratasóir, ná ní iarrfaidh sé/sí eolas breise ó aon duine.
- I gcás eisceachtúil, nuair atá líon na n-iarratas ard, féadfaidh an Cathaoirleach beirt nó níos mó den APC a ainmniú mar phríomhléitheoirí ar fho-thacair na n-iarratas.

#### 7.2.2. Le linn an Chruinnithe

- Roghnóidh an Cathaoirleach comhalta den APC chun an measúnú ar gach iarratas a threorú, agus tar éis don choiste iomlán breithniú a dhéanamh air, déanfar cinneadh comhchoiteann maidir le cibé acu ar sholáthair an t-iarrthóir dóthain fianaise chun cás prima facie a bhunú.

---

4 Ní cheanglófar ar chomhaltaí den Choiste ar shaoire shabóideach taighde nó as láthair de bharr cúinsí ar a n-áirítear tinneas etc. a bheith páirteach sa phróiseas cinnteoireachta.

5 Beidh cás prima facie ann má tá an chomhthuairim ag an APC, faoi réir na measúnachta riachtanaí ó shaineolaithe seachtracha, gur dóchúil go mbeidh ardú céime ann bunaithe ar na critéir ardaithe céime faoi riachtanais na scéime.

- Sa chás go gcinneadh an APC go bhfuil cás prima facie léirithe ag iarrthóir, comhaontóidh an APC liosta rangaithe de Mheasúnóirí Seachtracha ó liosta an iarrthóra agus, as féin, ó liosta an Chinn Scoile/an Déin Feidhmiúcháin agus roghnófar measúnóirí seachtracha, mar seo a leanas:
  - Ardú Céime chuig Léachtóir Sinsearach: Beirt mheasúnóirí sheachtracha (duine ó liosta an iarrthóra agus beirt ó liosta an Chinn Scoile/Déan Feidhmiúcháin);
  - Ardú Céime chuig Ollamh Pearsanta: Triúr measúnóirí seachtracha (duine ó liosta an iarrthóra agus beirt ó liosta an Chinn Scoile/Déin Feidhmiúcháin).
- Sa chás go gcinneadh an APC nach bhfuil cás prima facie ann don iarrthóir, iarrfar ar chomhalta den APC dréacht-tuairisc aiseolais a ullmhú lena breithniú agus lena faomhadh ag an APC. Ba chóir go mbeadh réasúnaíocht shoiléir sa tuairisc seo maidir leis an gcinneadh agus ba chóir go ndéanfaí cur síos ar na gníomhaíochtaí is gá don iarrthóir a dhéanamh chun a chinntiú go gcomhlíonfadh iarratas ina dhiaidh sin an tairseach agus go rachadh sé ar aghaidh chuig an athbhreithniú le tuairiscí na measúnóirí seachtracha. Ba chóir go dtabharfadh an t-aiseolas scála ama molta ina mbainfí na gníomhaíochtaí seo amach.
- Nuair atá gach tuairisc aiseolais aontaithe, cuirfidh an APC liosta na n-iarrthóirí nár bhain cás prima facie amach ar fáil le seoladh chuig an Uachtarán le faomhadh. Seolfar é seo chuig an Uachtarán an t-am céanna a seolfar an liosta moltaí maidir le hardú céime.

### 7.3. Tuairiscí na Measúnóirí Seachtracha

#### 7.3.1. Ról an APC

Sa chás gur aontaíodh go gcaithfear measúnóirí seachtracha a lorg, beidh na cúraimí seo a leanas ar chomhaltaí an APC, ag obair i mbeirteanna:

- Déanfar roinnt iarratas a shannadh dóibh;
- Athbhreithniú a dhéanamh ar liosta na measúnóirí seachtracha a chuir an t-iarrthóir agus an Ceann Scoile/Déan Feidhmiúcháin ar fáil;
- Liosta rangaithe de mheasúnóirí seachtracha a chomhaontú le moladh don Choiste iomlán.

#### 7.3.2. Ról na hOifige Acmhainní Daonna

- Rachaidh Acmhainní Daonna i dteagmháil le Measúnóirí Seachtracha atá roghnaithe de réir mar atá siad rangaithe ag an APC. Nuair is gá, rachaidh Acmhainní Daonna ar aghaidh chuig an gcéad mheasúnóir seachtrach roghnaithe eile ar an liosta go dtí go mbeidh an líon riachtanach tuairiscí faighte;
- Tabharfar 4 seachtaine do na measúnóirí tuairisc a sholáthar.
- Cuirfear na tuairiscí ar aghaidh chuig an APC lena mbreithniú nuair a bheidh an líon riachtanach tuairiscí ó na measúnóirí seachtracha faighte ag Acmhainní Daonna;

---

6 Ba chóir don Cheann Scoile cuí agus don Déan Feidhmiúcháin an liosta seo a aontú. I gcás easaontais, is cinneadh críochnaitheach cinneadh an Déin.

- Más rud é, ar chúis ar bith, go gcuirtear níos mó ná an líon riachtanach tuairiscí faoi bhráid Acmhainní Daonna, cuirfidh Acmhainní Daonna tuairiscí na measúnóirí seachtracha go léir ar aghaidh chuig an APC. Má tá an líon riachtanach tuairiscí dearfacha i measc an líon seo, déanfar iad a mheas;
- Más rud é go bhfaighidh Acmhainní Daonna tuairisc ó mheasúnóir a bhí rangaithe níos airde ná na tuairiscí a fuarthas roimhe seo agus a cuireadh ar fáil don APC, ní úsáidfear an tuairisc ach amháin má éilítear tuairisc eile mar gheall ar thuairisc a bheith curtha as an áireamh de bharr coimhlint leasa;
- Ní chuirfear tuairisc bhreise ar aghaidh chuig an APC ach amháin sa chás go gcuirtear tuairisc ó mheasúnóir seachtrach atá rangaithe níos airde as an áireamh mar gheall ar choimhlint leasa;
- Ag deireadh an phróisis, is féidir le hiarrthóirí cóipeanna de na tuairiscí ó na Measúnóirí Seachtracha a fháil ach teagmháil a dhéanamh le hOifig Saorála Faisnéise na hOllscoile.

#### **7.4. Modhanna Oibre – I ndiaidh an Mheasúnaithe Sheachtraigh**

- Roghnóidh an Cathaoirleach comhalta den APC chun tús a chur leis an bplé ar mheasúnú gach iarratais mar aon le tuairiscí ó na measúnóirí seachtracha, i gcoinne an Chreata Forbartha don Fhoireann Acadúil;
- Tabharfar deis do gach comhalta den choiste atá i láthair a bheith páirteach sa phlé;
- Sa chás go gcuireann measúnóir coimhlint leasa in iúl ina m(h)easúnú, déanfaidh an APC tuairisc an mheasúnóra a chur as an áireamh agus cuirfear tuairisc bhreise nó tuairiscí breise ar fáil. Sa chás go lorgaíonn an coiste tuairiscí breise ó na measúnóirí, breithneofar an t-iarratas ag an gcéad deis nuair a bheidh na tuairiscí breise ar fáil;
- Cinnfidh an APC ansin an bhfuil dóthain fianaise curtha ar fáil ag an iarrthóir i dtaca le hardú céime go dtí an leibhéal riachtanach, le tacaíocht ó mheasúnú seachtrach.
- Sa chás go moltar iarrthóir d'ardú céime, iarrfar ar chomhalta den APC dréacht-tuairisc aiseolais a ullmhú lena breithniú agus lena faomhadh ag an APC ag an gcéad chruinniú eile atá socraithe. Ba chóir go mbeadh réasúnaíocht shoiléir sa tuairisc seo maidir leis an gcinneadh agus, nuair is cuí, aon réimsí ar leith eile a lua.
- I gcás nach moltar iarrthóir d'ardú céime, iarrfar ar chomhalta den APC dréacht-tuairisc aiseolais a ullmhú lena breithniú agus lena faomhadh ag an APC ag an gcéad chruinniú eile atá socraithe. Ba chóir go mbeadh réasúnaíocht shoiléir sa tuairisc seo maidir leis an gcinneadh agus ba chóir go ndéanfaí cur síos ar na gníomhaíochtaí a d'fhéadfadh an t-iarrthóir a dhéanamh chun a chinntiú go n-éireodh níos fearr le hiarratas a dhéantar ina dhiaidh sin. Ba chóir go dtabharfadh an t-aiseolas scála ama molta ina mbainfí na gníomhaíochtaí seo amach.
- Nuair a bheidh na tuairiscí aiseolais uile aontaithe, cuirfidh an APC an liosta moltaí i gcrích a chuirfear ar aghaidh chuig an Uachtarán le faomhadh.

## 8. Deireadh an Phróisis

Tar éis dheireadh an phróisis:

- Cuirfear ainmneacha na n-iarrthóirí a mholfaidh an Coiste d'ardú céime ar aghaidh chuig an Uachtarán le faomhadh.
- Cuirfear ainmneacha na n-iarrthóirí nár mhol an Coiste d'ardú céime ar aghaidh chuig an Uachtarán le faomhadh chomh maith.
- Cuirfidh Cathaoirleach an Choiste an cinneadh maidir lena n-iarratas in iúl i scríbhinn do na hiarrthóirí agus tabharfar tuairisc aiseolais dóibh ar an gcúis/na cúiseanna leis an gcinneadh sin.
- Ba chóir d'iarrthóir a bhfuil cóipeanna dá t(h)uairisc ó na Measúnoirí Seachtracha de dhíth air/uirthi teagmháil a dhéanamh leis an Oifig Saorála Faisnéise.
- Cuirfear torthaí an phróisis measúnaithe in iúl do Dhéin na gColáistí agus do Chinn Scoile agus cuirfear cóip de na tuairiscí aiseolais ar fáil dóibh maidir leis na hiarrthóirí óna Scoil/Coláiste.
- Tabharfar deis d'iarrthóirí aiseolas ó bhéal a fháil freisin. Is é an duine ar an gCoiste a dhréachtaíonn aiseolas an iarrthóra a thabharfaidh aiseolas ó bhéal don iarrthóir freisin in éineacht leis an gCathaoirleach nó lena (h)ainmní.
- Tar éis aiseolas ó bhéal a thabhairt, déanfar nóta gairid den chruinniú aiseolais a dhréachtú agus a choinneáil mar thaifead ar an gcruinniú. Seolfar an nóta chuig an iarrthóir le hathbhreithniú agus le comhaontú tar éis an chruinnithe aiseolais ó bhéal.
- Cuirfear na hiarrthóirí rathúla in iúl d'Fhoireann Bainistíochta na hOllscoile mar mhír ghnáthaimh.
- Seolfar liosta d'iarrthóirí ar aghaidh lena gcur ar an taifead ag an gcéad chruinniú eile d'Údarás na hOllscoile agus den Chomhairle Acadúil nuair a bheidh deireadh leis an bpróiseas.
- Cuirfear na Measúnoirí Seachtracha ar an eolas faoi thoradh an iarrthóra ar sholáthair sé/sí teistiméireacht dó/di.
- Is é an dáta a dtiocfaidh an t-ardú céime i bhfeidhm d'iarrthóirí a n-éireoidh leo ná an chéad lá den mhí tar éis don Uachtarán moladh an Choiste Arduithe Céime Acadúla a fhaomhadh.

## 9. Nótaí agus Taifid

Beifear ag súil go ndéanfaidh gach comhalta den APC nótaí maidir lena m(h)easúnú ar gach iarratas. Ba chóir go mbeadh nótaí neamhphearsanta, fíor agus soiléir maidir leis an tuairm atá á thabhairt. Níor chóir go ndéanfadh nótaí comparáid idir iarrthóirí ach ba chóir go ndéanfadh siad tagairt don Chreat Forbartha don Fhoireann Acadúil nó do ráitis a rinne an t-iarrthóir, an Ceann Scoile, an Déan Feidhmiúcháin, nó na Measúnoirí Seachtracha. Seolfar nótaí aonair chuig an riarthóir Acmhainní Daonna agus coinneofar iad ar feadh 12 mhí ar a laghad. Beidh nótaí agus miontuairiscí ábhartha ar fáil d'iarrthóirí ar iarratas i ndiaidh dheireadh an phróisis, lena n-áirítear aiseolas scríofa agus



aiseolas ó bhéal. Soláthraítear tuairiscí ó na measúnóirí seachtracha faoi rún (faoi chuimsiú an chreata a bhaineann leis an reachtaíocht um Shaoráil Faisnéise) agus mar sin coinneoidh an Oifig Acmhainní Daonna iad agus féadfaidh iarrthóirí iarratas a dhéanamh orthu faoi Shaoráil Faisnéise.

## **10. Rúndacht**

Coimeádfaidh gach rannpháirtí rúndacht i rith an phróisis. Beidh an plé ar fad le linn an phróisis measúnaithe agus aon sonraí a ghintear faoi rún ag comhaltaí an Choiste Arduithe Céime Acadúla. Ní scaoilfear ainmneacha na n-iarrthóirí a gheobhaidh ardú céime go dtí go mbeidh moltaí an APC faofa ag an Uachtarán agus go mbeidh na hiarrthóirí curtha ar an eolas dá réir.

## **11. Iarratais Neamhiomlána**

Ní dhéanfaidh an APC iarratais neamhiomlána a chur chun cinn. Sa chás go dtugann an Coiste iarratas neamhiomlán faoi deara, déanfar é seo a chur ar ais chuig an iarratasóir, agus tabharfar cuireadh dó/di aghaidh a thabhairt ar na ceisteanna atá le réiteach agus é a chur isteach arís i mbabhta eile ina dhiaidh sin.

DP&R,  
16.x.2019.